



15 Jun 2017
15 June 2017
P. U. (A) 173

WARTA KERAJAAN PERSEKUTUAN

FEDERAL GOVERNMENT GAZETTE

PERATURAN-PERATURAN CUKAI BARANG DAN PERKHIDMATAN (PENGEMUKAAN MAKLUMAT) 2017

GOODS AND SERVICES TAX (PROVISION OF INFORMATION) REGULATIONS 2017

DISIARKAN OLEH/
PUBLISHED BY
JABATAN PEGUAM NEGARA/
ATTORNEY GENERAL'S CHAMBERS

AKTA CUKAI BARANG DAN PERKHIDMATAN 2014

PERATURAN-PERATURAN CUKAI BARANG DAN PERKHIDMATAN
(PENGEMUKAAN MAKLUMAT) 2017

PADA menjalankan kuasa yang diberi oleh perenggan 177(2)(a) Akta Cukai Barang dan Perkhidmatan 2014 [*Akta 762*], Menteri membuat peraturan-peraturan yang berikut:

Nama dan permulaan kuat kuasa

1. (1) Peraturan-peraturan ini bolehlah dinamakan **Peraturan-Peraturan Cukai Barang dan Perkhidmatan (Pengemukaan Maklumat) 2017**.

(2) Peraturan-Peraturan ini mula berkuat kuasa pada 1 Julai 2017.

Tafsiran

2. Dalam Peraturan-Peraturan ini—

“peranti” ertinya suatu peralatan termasuk perisian yang boleh—

(a) menerima, menghantar, menyimpan, melapor dan mencetak maklumat yang dimasukkan ke dalamnya pada masa sebenar;

(b) merekod semua pembekalan yang dibuat dan pembayaran yang diterima;

(c) menerima, merekod, menunjukkan dan menghantar mesej amaran yang disebabkan oleh—

(i) kegagalan peranti dan rangkaian untuk berfungsi;

(ii) akses tanpa kebenaran ke dalam sistem;

(iii) kegagalan untuk log masuk; dan

(iv) pemutusan memori;

(d) menyediakan kemudahan untuk melihat, menganalisis, dan menjana laporan tentang semua pembekalan yang dibuat dan pembayaran yang diterima oleh orang berdaftar dan untuk mencetak laporan itu;

(e) menyediakan ciri-ciri keselamatan bagi peranti; dan

(f) apa-apa operasi elektronik yang lain yang ditentukan oleh Ketua Pengarah,

dan tidak berupaya untuk menterbalikkan atau memadam apa-apa data yang dimasukkan berkenaan dengan pembekalan yang dibuat dan pembayaran yang diterima atau apa-apa maklumat lain termasuk tarikh dan masa;

“mesin elektronik” ertinya suatu mesin elektronik yang mempunyai kapasiti untuk merakam maklumat mengenai pembekalan yang dibuat dan pembayaran yang diterima dan mengeluarkan invois cukai;

“orang berdaftar” ertinya orang berdaftar yang ditetapkan di bawah subperaturan 3(1).

Pengemukakan maklumat oleh orang berdaftar di bawah seksyen 34A Akta

3. (1) Orang berdaftar yang dikehendaki mengemukakan maklumat tentang semua pembekalan yang dibuat dan pembayaran yang diterima oleh orang berdaftar itu kepada Ketua Pengarah di bawah seksyen 34A Akta ialah orang berdaftar yang menjalankan perniagaan yang ditentukan dalam Jadual.

(2) Maklumat yang dikehendaki untuk dikemukakan di bawah subperaturan (1) hendaklah dikemukakan melalui suatu peranti yang dipasang pada suatu mesin elektronik yang digunakan bagi maksud perniagaan orang berdaftar itu.

Tanggungjawab orang berdaftar untuk memasukkan maklumat ke dalam, dan mengeluarkan invois cukai melalui, mesin elektronik

4. (1) Orang berdaftar hendaklah—

(a) memasukkan ke dalam suatu mesin elektronik maklumat tentang semua pembekalan yang dibuat dan pembayaran yang diterima oleh orang berdaftar itu; dan

(b) mengeluarkan invois cukai melalui suatu mesin elektronik.

(2) Mana-mana orang berdaftar yang melanggar peraturan ini melakukan suatu kesalahan.

Butir-butir yang dikehendaki dikemukakan oleh orang berdaftar

5. (1) Bagi maksud pemasangan peranti di bawah seksyen 34A Akta dan pengemukaan maklumat di bawah peraturan 3, orang berdaftar hendaklah mengemukakan kepada Ketua Pengarah butir-butir yang berikut dalam bentuk dan mengikut cara yang ditentukan oleh Ketua Pengarah:

(a) alamat premis perniagaan orang berdaftar itu termasuk cawangan atau mana-mana tempat lain yang perniagaannya dijalankan, jika ada;

(b) perihalan mesin elektronik yang digunakan bagi maksud perniagaan orang berdaftar itu; dan

(c) apa-apa maklumat lain yang dikehendaki oleh Ketua Pengarah.

(2) Butir-butir yang dikehendaki di bawah subperaturan (1) hendaklah dikemukakan dalam tempoh yang ditentukan oleh Ketua Pengarah.

(3) Walau apa pun subperaturan (2), mana-mana orang berdaftar yang telah berdaftar pada tarikh Peraturan-Peraturan ini mula berkuat kuasa hendaklah mengemukakan butir-butir yang dikehendaki di bawah subperaturan (1) kepada

Ketua Pengarah dalam tempoh empat belas hari dari tarikh kuat kuasa Peraturan-Peraturan ini.

(4) Mana-mana orang berdaftar yang melanggar peraturan ini melakukan suatu kesalahan.

Pemberitahuan perubahan pada operasi perniagaan

6. (1) Orang berdaftar hendaklah dengan serta-merta memberitahu Ketua Pengarah secara bertulis—

- (a) tentang apa-apa perubahan alamat premis perniagaan orang berdaftar itu termasuk cawangan atau mana-mana tempat lain yang perniagaannya dijalankan;
- (b) tentang apa-apa perubahan bilangan cawangan atau mana-mana tempat lain yang perniagaan orang berdaftar itu dijalankan;
- (c) tentang apa-apa penggantian mesin elektronik oleh orang berdaftar itu;
- (d) jika berlaku penamatan perniagaan, pengubahsuaian premis perniagaan atau penutupan sementara operasi perniagaan orang berdaftar itu;
- (e) jika operasi perniagaan dijalankan di tempat selain premis perniagaan orang berdaftar itu; dan
- (f) tentang apa-apa hal keadaan lain sebagaimana yang dikehendaki oleh Ketua Pengarah.

(2) Mana-mana orang berdaftar yang melanggar peraturan ini melakukan suatu kesalahan.